



UPM Jalan Penyelidikan Baka, Kesehatan Dan Makanan Ternakan Kambing Di Sabah



Naib Canselor UPM, Prof. Datuk Dr. Nik Mustapha R. Abdullah (kanan) menerima cenderahati daripada Pengurus Besar KPD, Datu Basrun Datu Mansor (kiri).

KOTA KINABALU, 28 Disember – Universiti Putra Malaysia (UPM) sedang menjalankan projek penyelidikan pembiakbakaan, makanan dan kawalan penyakit ternakan kambing Boer secara sistematik dan moden dengan agensi Kerajaan Negeri Sabah iaitu Korporasi Pembangunan Desa, Sabah (KPD).

Projek pembangunan penyelidikan pengkomersilan yang diuruskan oleh Pusat Inovasi dan Pengkomersilan (ICC) UPM dan Fakulti Perubatan Veterinar (FPV) UPM tersebut bertajuk 'Pembangunan Protokol Kesehatan Ternakan Yang Lestari Untuk Ladang Ternakan Kambing Korporasi Pembangunan Desa, Sabah'.



Pengerusi Korporasi Pembangunan Desa, Sabah (KPD), Ahmad Bujang (dua dari kiri) menandatangani surat perjanjian bersama Naib Canselor UPM, Prof. Datuk Dr. Nik Mustapha R. Abdullah (dua dari kanan).

Projek diketuai oleh penyelidik FPV, Prof. Dr. Mohd Zamri Saad dengan dibantu Prof. Madya Dr. Azhar Kasim (Fakulti Pertanian) dan Prof. Madya Dr. Md. Zuki Abu Bakar (FPV) berjaya mendapat peruntukan geran Technofound, Kementerian Pertanian dan Industri Asas Tani (MOA) sebanyak RM3.17 juta baru-baru ini.

Naib Canselor UPM, Prof. Datuk Dr. Nik Mustapha R. Abdullah berkata projek kerjasama selama dua tahun itu diharapkan dapat mengembangkan sumber kepakaran UPM kepada KPD terutamanya dalam menghasilkan formula makanan ternakan dengan menggunakan bahan buangan pertanian untuk membangunkan program pemakanan bagi penternak kambing di Sabah.

Selain itu katanya UPM akan mendapatkan kaedah bagi mengawal penyakit dan menambahbaik status kesihatan haiwan ternakan.

“Melalui kerjasama penyelidikan antara UPM dan KPD, misi KPD untuk membantu penduduk luar bandar meningkatkan taraf hidup masing-masing dengan mengeluarkan produk pertanian yang berkualiti dan komersial akan tercapai,” katanya semasa menandatangani surat perjanjian bekerjasama (collaborative agreement) dengan KPD.

Perjanjian turut ditandatangani oleh Pengerusi KPD, Ahmad Bujang dan disaksikan oleh Pengurus Besar KPD, Datu Basrun Datu Mansor dan Pengarah ICC UPM Prof. Dato' Mohamed Shariff Mohamed Din.

Timbalan Ketua Menteri Sabah merangkap Menteri Pertanian dan Industri Makanan Negeri Sabah, Datuk Seri Panglima Yahya Hussin dalam ucapannya berharap melalui kerjasama itu, KPD mampu mengeluarkan produk untuk pasaran tempatan dan antarabangsa dan mempertingkatkan penyertaan masyarakat petani di luar bandar dalam industri asas tani.



Timbalan Ketua Menteri Sabah merangkap Menteri Pertanian dan Industri Makanan Negeri Sabah, Datuk Panglima Yahya Hussin (kanan) melawat foto pameran.

UNTUK MAKLUMAT LANJUT HUBUNGI KETUA PROJEK PROF. DR. MOHD. ZAMRI SAAD 012-3952921, DR. AZHAR KASIM 012-2989141, DR. MD. ZUKI ABU BAKAR 019-6046659 ATAU SEKSYEN MEDIA BAHAGIAN KOMUNIKASI KORPORAT, KHAIRUL ANUAR MUHAMAD NOH 013-3957650.